

06/11/1999

Dr M penerima pertama anugerah PAM

PUTRAJAYA, Jumaat - Perdana Menteri, Datuk Seri Dr Mahathir Mohamad, dipilih sebagai penerima pertama Anugerah Presiden yang disediakan oleh Pertubuhan Arkitek Malaysia (PAM).

Anugerah yang baru diperkenalkan PAM itu akan diberi kepada individu atau organisasi yang mempamerkan komitmen untuk merealisasikan wawasan membabitkan bidang seni bina.

Presidennya, Datuk Pardi Wardi, ketika mengumumkan nama pemenang bagi anugerah sulung itu berkata keputusan memilih Dr Mahathir adalah disebabkan sumbangan beliau terhadap pembangunan fizikal yang dicapai negara ini sejak beberapa tahun lalu.

"Pertumbuhan memberangsangkan ini adalah hasil perancangan daripada pemimpin negara yang menyediakan infrastruktur fizikal kepada rakyat," katanya.

Beliau berkata demikian pada pelancaran buku KLIA: Gateway to Malaysia oleh Datuk Esa Mohamad, yang dilakukan Dr Mahathir di Jabatan Perdana Menteri, di sini, hari ini.

Perdana Menteri yang terkejut dengan pemilihan itu berkata: "Saya cuma arah saja yang buat itu orang lain, yang dapat nama kita."

Sementara itu, buku yang dilancarkan mengandungi sejarah pembinaan KLIA sejak dari awal perancangannya sehingga terbentuk sebagai antara lapangan terbang terancang di rantau ini.

Penulisnya yang juga bekas presiden PAM terbabit secara langsung dengan pembinaan lapangan terbang itu.

Buku berkulit tebal dengan 150 muka surat itu dipenuhi gambar pemandangan di sekitar KLIA di Sepang.

Buku terbitan Architectural Sign Network Sdn Bhd itu dijual pada harga RM250 sebuah.

(END)